



**Kementerian Wilayah Persekutuan**

**TEKS UCAPAN**

**YB DATUK SERI UTAMA TENGKU ADNAN BIN TENGKU MANSOR**

**MENTERI WILAYAH PERSEKUTUAN**

**KENDURI 1 WILAYAH PERSEKUTUAN**

**PARLIMEN KEPONG**

**Bismillahirrahmanirrahim**

**Salutasi**

**Assalamualaikum Warahmatullahi Wabarakatuh  
Dan Salam Sejahtera**

## **PENDAHULUAN**

1. Marilah sama-sama kita panjatkan kesyukuran ke hadrat Allah swt kerana dengan izin dan limpah kurnia Nya kita dapat bersama-sama pada hari ni dalam Program Kenduri 1Wilayah Persekutuan sempena Sambutan Hari Wilayah Persekutuan tahun 2017.
2. Kita semua amat bertuah kerana Negara Malaysia sentiasa dan masih lagi dalam keadaan aman. Kita boleh mengadakan majlis sebegini dengan selesa, beribadah dan beriadah dengan tenang tanpa sebarang ketakutan. Kuncinya adalah perpaduan, saling menghormati dan kerjasama antara satu sama lain.
3. Lantaran itu, soal perpaduan dan saling menghormati ini perlu sentiasa diterap dan disemai; dan kita patut bersyukur kerana kerajaan yang mentadbir negara ini mampu mengekalkan keamanan dan mengutamakan kepentingan rakyat serta kesejahteraan negara.

**Tuan-tuan dan Puan-puan yang dihormati sekalian,**

## **OBJEKTIF KENDURI 1WILAYAH PERSEKUTUAN**

4. Kenduri 1Wilayah Persekutuan merupakan program *signature* Sambutan Hari Wilayah Persekutuan di bawah kluster program mesra rakyat. Kenduri 1Wilayah Persekutuan ini telah mula kita laksanakan sejak tahun 2011. Sebelum ini kita laksanakan secara serentak di ketiga-tiga Wilayah Persekutuan tetapi kini bagi mendekati rakyat secara lebih akrab, maka program ini dilaksanakan secara berperingkat mengikut parlimen di sepanjang bulan Februari.
5. Parlimen Kepong ini adalah pembuka kepada program Kenduri 1Wilayah Persekutuan. Kita mendapati program ini amat memberi impak yang positif kepada warga Wilayah Persekutuan khususnya dalam jalinan ukhwah semasa insan. Program ini juga dilihat dapat menyatukan pelbagai kaum di kawasan tersebut dengan penglibatan semua pihak dalam penganjuran program kenduri ini.

## **IMPAK KENDURI 1WILAYAH PERSEKUTUAN**

6. Saya dapat lihat kerjasama serta perpaduan sesama ahli komuniti berganding bahu merewang untuk memasak makanan serta penyediaan khemah dan aktiviti-aktiviti lain bagi memeriahkan dan membangkitkan suasana kenduri. Anak-anak pastinya lagi gembira boleh bermain bersama rakan-rakan yang pastinya dapat menceriakan suasana kenduri ini.

7. Program ini turut menjadi landasan dalam usaha Kementerian Wilayah Persekutuan menzahirkan keseimbangan pembangunan modal insan warga Wilayah Persekutuan melalui pengisian aktiviti yang melibatkan menyertaan komuniti. Pasti program kenduri ini menjadi salah satu elemen penting dalam memacu perpaduan dan kestabilan sosial khususnya di kalangan warga kota.
  
8. Sekali lagi pada tahun ini, Kementerian Wilayah Persekutuan dan agensi-agensi di bawahnya akan mengadakan 13 program kenduri di setiap lokasi Parlimen iaitu di Kuala Lumpur, Putrajaya dan Labuan. Saya amat berbesar hati dengan kerjasama yang diberikan oleh Pusat-Pusat Khidmat Masyarakat, badan-badan bukan Kerajaan, Persatuan-Persatuan Penduduk, Majlis Perwakilan Penduduk serta Dewan-Dewan Perniagaan yang sentiasa bersedia menghulurkan tangan untuk bersama-sama Kementerian dalam menyokong segala usaha yang dilaksanakan oleh Kerajaan khususnya.
  
9. Penganjuran Kenduri 1Wilayah Persekutuan 2017 ini akan memberikan peluang kepada semua warga Wilayah Persekutuan untuk merasai kemeriahan suasana kenduri walaupun kita tinggal di Bandar. Sambil menjamu selera dengan menu yang dimasak sendiri secara bergotong royong di kalangan ahli jawatankuasa perumahan serta komuniti yang terlibat pastinya dapat menghidupkan kembali budaya tradisi zaman datuk nenek kita dahulu yang semakin luntur ditelan zaman. Kementerian mendapat reaksi yang positif daripada

kalangan komuniti yang gembira dengan penganjuran program seumpama ini.

10. Program pada hari ini adalah salah satu daripada pendekatan Strategi Lautan Biru (NBOS) dalam menggabungkan program-program yang dilaksanakan oleh NGO dan badan-badan korporat. Melalui pendekatan seumpama ini, penganjuran program dapat dilaksanakan dengan lebih mantap, menjimatkan kos dan masa. Perkara ini dapat dilihat dengan jelas melalui penganjuran program pada hari ini di mana kos penganjuran dibiayai oleh Kementerian, DBKL dan agensi-agensi kerajaan.
11. Selain aktiviti rewang, saya difahamkan pelbagai aktiviti lain turut diadakan termasuk senamrobik, pertandingan mewarna, pertandingan pakaian tradisional, sukaneka, pertandingan gubahan, cabutan nombor bertuah yang pastinya pelbagai hadiah hebat menanti semua dan banyak lagi aktiviti menarik telah pun berlangsung sejak dari pagi tadi dan akan berterusan sehingga petang nanti.
12. Saya juga ingin mengucapkan ribuan terima kasih kepada Persatuan Penjaja Kepong yang sudi meringankan beban golongan fakir miskin dan warga emas di kawasan Kepong ini sempena Sambutan Tahun Baru Cina. Semoga sumbangan yang disampaikan ini memberi sinar kepada para penerima dan sedikit sebanyak dapat membantu dalam kehidupan mereka.

**Tuan-tuan dan Puan-puan yang dihormati sekalian,**

## **SAMBUTAN HARI WILAYAH PERSEKUTUAN**

13. Saban tahun, tarikh 1 Februari amat bermakna kepada kita semua sebagai warga Wilayah Persekutuan dengan sambutan Hari Wilayah Persekutuan bagi memperingati pengisytiharan Kuala Lumpur, Putrajaya dan Labuan sebagai Wilayah Persekutuan. Kementerian Wilayah Persekutuan mula mengadakan sambutan sejak tahun 2004. Sambutan pada tahun ini merupakan sambutan yang ke-13.
14. Kementerian juga mengekalkan tema sambutan Hari Wilayah Persekutuan sama seperti pada tahun lepas iaitu “Wilayah Ceria Rakyat Sejahtera”. Saya yakin bahawa tema ‘Wilayah Ceria, Rakyat Sejahtera’ bertepatan dengan aspirasi Kementerian Wilayah Persekutuan yang ingin menjadikan Wilayah Persekutuan Kuala Lumpur, Putrajaya dan Labuan sebagai sebuah bandar yang ceria merangkumi persekitaran yang bersih; kemudahan pengangkutan yang kondusif; sistem pengangkutan yang sistematik dan seterusnya meningkatkan produktiviti warga Wilayah Persekutuan.
15. Harapan saya dengan slogan ini, ia mampu merangsang seluruh warga Wilayah agar seiringan dengan Kementerian Wilayah Persekutuan bagi memajukan serta memakmurkan bumi Wilayah

Persekutuan yang tercinta ini sebagai sebuah bandar raya metropolis yang lestari untuk dihuni sepanjang masa.

16. Selain itu, semangat perpaduan, kekitaan, kebersamaan dan menambahkan rasa sayang kepada Wilayah Persekutuan akan terus teguh di kalangan warga Wilayah Persekutuan.
17. Sebanyak 45 program akan dilaksanakan sepanjang bulan sambutan Hari Wilayah Persekutuan pada tahun ini. Keistimewaan sambutan pada tahun ini adalah Kementerian banyak memperkenalkan program-program baru yang berimpak tinggi. Program-program yang disusun melibatkan pelbagai lapisan masyarakat dari golongan kanak-kanak, remaja, belia dan juga dewasa. Pasti program pada tahun ini lebih meriah dan ceria.
18. Kita sedar negara sedang berada dalam keadaan ekonomi yang agak mencabar serta kos sara hidup rakyat yang semakin meningkat. Oleh itu, pelaksanaan program-program Sambutan Hari Wilayah Persekutuan tahun 2017 tidak diadakan secara berlebihan.
19. Langkah ini selari dengan saranan YAB Perdana Menteri agar terus mengekalkan inisiatif penjimatan khususnya dalam aspek penganjuran majlis/program.

20. Oleh itu, sambutan pada tahun ini tidak diadakan secara berlebihan. Terdapat beberapa program yang dilaksanakan secara *smart partnership* dan digabungkan dengan kerjasama Persatuan-persatuan, NGO, badan korporat yang akhirnya mencapai matlamat dalam merealisasikan inisiatif penjimatan seperti yang disarankan oleh pihak Kerajaan serta memberi manfaat kepada rakyat khususnya.

**Tuan-tuan dan Puan-puan yang dihormati sekalian,  
INISIATIF MENSEJAHTERAKAN RAKYAT WILAYAH PERSEKUTUAN  
DI PARLIMEN KEPONG**

21. Untuk makluman tuan-tuan dan puan-puan, Kementerian sentiasa berusaha untuk memberikan perkhidmatan yang terbaik kepada rakyat. Oleh itu, pelbagai inisiatif mensejahterakan rakyat sentiasa dilaksanakan bagi memastikan rakyat mendapat manfaat yang terbaik daripada usaha yang dibuat.

22. Seperti mana rakyat ingin memiliki rumah di Kuala Lumpur, Kerajaan menyediakan inisiatif perumahan mampu milik dengan membina RUMAWIP iaitu Residensi Kepongmas di Taman Metropolitan yang dibangunkan khas untuk komuniti setempat. Sebanyak 1,514 unit rumah bakal disediakan dengan harga serendah antara RM188 ribu ke RM198 ribu seunit dan dijangka siap pada tahun 2019. Ini membuktikan kesungguhan kerajaan dalam melaksanakan apa yang dijanjikan kepada rakyat.



23. Selain itu, Kerajaan turut menyediakan Perkhidmatan bas sekolah secara percuma telah memberi manfaat kepada 8,072 pelajar yang merupakan anak-anak penghuni rumah Program Perumahan Rakyat dan Perumahan Awam di sekitar ibu kota. Pendekatan ini merupakan inisiatif baharu kerajaan bagi menangani kemiskinan bandar serta mengurangkan beban dan kos sara hidup.
  
24. Kementerian melalui DBKL dan Pejabat Cawangan juga sering menganjurkan program-program pembersihan dan pengindahan yang dibuat secara berjadual. Ini adalah sebahagian usaha yang dibuat untuk mengurangkan gejala-gejala penyakit yang berbahaya seperti demam denggi, zika, demam kepialu dan banyak lagi penyakit yang boleh menular jika kita tidak menjaga kebersihan. Oleh itu, kepada semua ahli komuniti Parlimen Kepong, marilah kita bersama-sama menjalankan tanggungjawab menjaga kebersihan dan keindahan serta keceriaan parlimen ini sekaligus menjaga kebersihan ibu kota yang disayangi.
  
25. Aktiviti penyelenggaraan kemudahan awam dan perumahan penduduk juga seringkali dibuat oleh DBKL bagi memastikan kesejahteraan penduduk terjaga. Oleh itu, saya ingin menyeru kepada semua penduduk serta kerjasama daripada Majlis Perwakilan Penduduk (MPP) agar memastikan vandalisme tidak berlaku di kawasan perumahan yang diduduki. Sayangi dan gunalah dengan

sebaiknya segala kemudahan yang disediakan demi kemaslahatan bersama.

26. Seiring dengan aspirasi YAB Perdana Menteri, yang memberi fokus kepada pembangunan dan rangkaian pengangkutan awam yang komprehensif bagi Greater KL. Projek MRT Line 2 memberikan impak kepada Parlimen Kepong di mana Stesen MRT turut akan dibina di laluan yang menghubungkan Sungai Buloh ke Putrajaya iaitu di Jalan Kepong.

**Tuan-tuan dan Puan-puan yang dihormati sekalian,**

## **PENUTUP**

27. Adalah diharapkan kesemua program yang diatitkan ini diharapkan mendapat komitmen dan penyertaan sepenuhnya rakyat daripada pelbagai lapisan masyarakat khususnya warga Wilayah Persekutuan untuk sama-sama merasai kemeriahan Sambutan Hari Wilayah Persekutuan.
28. Akhir kata, saya ingin mengucapkan setinggi-tinggi penghargaan kepada Jawatankuasa Penganjur Kenduri 1Wilayah Persekutuan Parlimen Kepong dan semua pemimpin masyarakat setempat yang telah bertungkus lumus dan memberikan kerjasama yang amat baik

sekali dalam penganjutan program pada hari ini. Semoga segala usaha murni kita ini akan diberkati oleh Allah swt.

29. Dengan ini, saya mengakhiri ucapan saya dengan Wabillahi Taufik Wal hidayah. Wassalamualaikum Warrahmatullahi Wabarakatuh.